



АКАФИСТ

УМИЛИТЕЛЬНЫЙ

ГОСПОДУ

ИИСУСУ ХРИСТУ,

ПРАВЕДНЕЙШЕМУ СУДИИ И МЗДОВОЗДАТЕЛЮ НАШЕМУ,

В ПАМЯТЬ

ВСЕОБЩЕГО ВОСКРЕСЕНИЯ

И СТРАШНОГО СУДА

**ИЗДАТЕЛЬСТВО
МОСКОВСКОГО ПОДВОРЬЯ
СВЯТО-ТРОИЦКОЙ СЕРГИЕВОЙ ЛАВРЫ**

МОСКВА - 2000

ОГЛАВЛЕНИЕ

ОТ ИЗДАТЕЛЬСТВА.....3

**ПОСЛЕДОВАНИЕ МОЛЕБНОГО ПЕНИЯ
С АКАФИСТОМ УМИЛИТЕЛЬНЫМ ГОСПОДУ ИИСУСУ ХРИСТУ.....6**

КАНОН ПОКАЯННЫЙ КО ГОСПОДУ НАШЕМУ ИИСУСУ ХРИСТУ15

АКАФИСТ В ПАМЯТЬ ВСЕОБЩЕГО ВОСКРЕСЕНИЯ И СТРАШНОГО СУДА...19

ОТ ИЗДАТЕЛЬСТВА

Время, в которое мы живем, нередко называют апокалиптическим. И действительно - похоже, что листья смоковницы уже на самом деле мягки (см.: Мф. 24, 32). Беды и скорби входят под кровы человеческих жилищ все чаще не как гости, а как полноправные хозяева. Кровопролитные междоусобные войны уносят жизни молодых, полных еще сил людей, неизлечимые болезни поражают наших близких, многие, так и не обретя смысла своего существования, оставляют этот мир сами и уходят во тьму. Политические и экономические кризисы, экологические бедствия - все это вошло в ряд привычных реалий современности. И неудивительно, что в этом, а главное - во все большем отступлении современного человечества от своего Создателя и данного Им закона, многие склонны ныне видеть сбывающиеся пророчества Откровения. Так это обстоит у нас, переживающих сегодня то, что принято называть "смутным временем".

Но и там, где жизнь представляется относительно стабильной, благополучной, на деле все, быть может, обстоит еще гораздо хуже, чем в нашем Отечестве. Христианин знает, что Бог создал человека для Себя. Знает, что смысл жизни его не в достижении им экономического благосостояния, не в развитии технического прогресса и даже - не в созидании культурных ценностей. Нет, смысл человеческого бытия в том, чтобы быть с Богом, исполнять Его волю и в конце концов наследовать жизнь иную - вечную, нескончаемую. А ведь именно это-то сегодня и забыто, отвергнуто. Забыто то, чего ради сотворил Бог человека, чего ради неустанно промышлял и промышляет о нем, чего ради Сын Божий пришел в этот мир и претерпел крестную смерть.

Но отступление не может быть бесконечным - всему положен свой предел в этом скоропреходящем мире. Либо каются люди, и тогда являет Свою милость Господь, долготерпит о нас, желающий всем спастись. Либо - отступление само наказывает отступников, и **является гнев Божий на сынов противления** (ср.: Кол. 3, 6), праведный и страшный.

Никто, никакой прозорливец, никакой святой не назовет дня кончины видимого мира - того дня, которого не знают и Ангелы Божии, но который ведом одному лишь Отцу. Не однажды казалось уже, что вот, совсем **близко, при дверех** (ср.: Мф. 24, 33) тот час, когда небо убежит от лица Божия, а земля и все дела на ней сгорят (см.: Откр. 20, 11; 2 Пет. 3, 10). Но кровь мучеников и исповедников и слезы кающихся угашали уже готовый возгореться

огонь. И людям вновь и вновь давалось время, и вновь к спасающимся прилагались спасающиеся.

Да, человечество много раз строило свою Вавилонскую башню, желая взойти на небеса и отвергнуть всякую над собою Божественную власть. И раз за разом Господь милостиво пресекал это безумное начинание, не давая совершиться ему - ради тех, кто еще мог быть спасен. Видим мы эту башню строящейся и сегодня. И, пожалуй, трудно не согласиться с тем, что никогда не была она столь высока и столь близка к завершению, как сейчас. Чем кончится это? Разрушится ли она и похоронит под своими обломками как дерзких строителей, так и многих, ни в чем неповинных людей, как бывало и прежде, или же достроена будет до конца и тем ознаменует окончание всей мировой истории? Ответ на это знает только Господь.

Но как бы то ни было, трудно избавиться от все более усиливающегося беспокойства, рождающегося в нас от созерцания картин современного мира, беспокойства, которое во многих постепенно перерастает в страх. Сколько сегодня вещей, вызывающих у людей недоумения, тягостные и трудноразрешимые, производящих разделения и нестроения! Что стоит одно лишь введение системы расчетных карт с тремя шестерками в электронном коде, создающей в недалекой перспективе возможность тотального контроля над жизнью человечества в целом, того тотального контроля, который и может, в первую очередь, послужить основой для установления на земле царства антихриста!

Что делать нам перед лицом всех этих страхов, скорбей и недоумений, многочисленных угроз? Ведь все больше и больше приходит понимание того, что человеческие средства здесь бессильны... Наверное, именно сейчас следует вспомнить то, чего и нельзя никак было забывать. Наш Господин и Владыка - Всемогущий Бог, повелевающий всем, от Которого и всякое господство, и власть (см.: Дан. 2, 37). И Он, в Своем могуществе и неизреченной славе, недалек от каждого из нас - тех, кого благоволил назвать Своим малым стадом, в котором Он - добрый и милосердный Пастырь.

Господь не оставил нас в неизвестности о том, какие судьбы постигнут этот мир, каков будет конец его и что будет предшествовать ему. **Вот, Я наперед сказал вам** все (Мф. 24, 25), - возвестил Господь Своим ученикам на горе Елеонской, предуказывая этим те скорби и бедствия, которые нам предстоит испытать. Но и еще Он сказал: **молитесь, да не ввидете в искушения;** и: **все, чего ни попросите в молитве с верою, веруйте, что примите** (ср.:

Мф. 26, 41; 21, 22), указывая нам тем самым, что избавления от бедствий тех и спасения достигнем мы через молитву. Быть может, мы и не минуем скорбей, но в молитве разрешатся наши недоумения, она не только поможет нам выстоять в испытаниях и многообразных искушениях, но силою и благодатью Христа Бога нашего поставит нас перед Ним неосужденными в день Страшного Его Суда.

Прекрасный образец такой молитвы представляет публикуемый здесь акафист, найденный в бумагах блаженного старца Севастиана Карагандинского при подготовке материалов к его канонизации. Предполагается, что привезен был он кем-то из русского духовенства, проживавшего после прихода к власти в России большевиков в Шанхае и вынужденного оставить город во время революционных событий в самом Китае. Но кто именно является его автором, сказать наверняка уже невозможно. Известно лишь, что преподобный Севастиан читал его сам и благословлял читать своим духовным чадам.

В настоящее время этот акафист получил большое распространение - по месту обретения своего - в Алма-Атинской епархии: последование "Молебного пения с акафистом умилительным Господу Иисусу Христу, Праведнейшему Судии и Мздовоздаятелю нашему, в память всеобщего Воскресения и Страшного Суда" совершается как в городском кафедральном соборе Алматы, так и во многих приходских церквях. Так же, в составе указанного последования публикуем акафист и мы.

Само последование представляет собой специально составленный чин утрени и может совершаться в храмах, например, в Неделю вечером, подобно тому, как принято совершать Великим постом Пассию. Может читаться акафист и дома, и келейно - либо вместе с предложенным с ним покаянным каноном ко Господу нашему Иисусу Христу, либо же отдельно.

Думаем, что молитвенные слова и чувства, выраженные в нем, послужат утешением для многих христиан, испытывающих сегодня при размышлении об окружающей нас действительности недоумение и скорбь. Думаем так потому, что весь он проникнут непоколебимой верой в беспредельное всемогущество Божие и теплейшим упованием на неизреченную Божественную милость. Вера же и упование эти, оживая - в храмовой ли, келейной ли - молитве, исполняют собой и согреют сердца молящихся, прольются в души их небесною отрадой.

ПОСЛЕДОВАНИЕ МОЛЕБНОГО ПЕНИЯ С АКАФИСТОМ УМИЛИТЕЛЬНЫМ ГОСПОДУ ИИСУСУ ХРИСТУ

По возгласе иерея: Слава Святей, и Единосущней, и Животворящей, и Нераздельней Троице всегда, ныне и присно и во веки веков.

Лик: Аминь.

Диакон: Слава Тебе, Боже наш, слава Тебе.

Царю Небесный, Утешителю, Душе истины, Иже везде сый и вся исполняй, Сокровище благих и жизни Подателю, прииди и вселися в ны, и очисти ны от всякия скверны, и спаси, Блаже, души наша.

Святой Боже, Святой Крепкий, Святой Безсмертный, помилуй нас.
(Трижды)

Слава Отцу и Сыну и Святому Духу, и ныне и присно и во веки веков.
Аминь.

Пресвятая Троице, помилуй нас; Господи, очисти грехи наша; Владыко, прости беззакония наша; Святой, посети и исцели немощи наша, имене Твоего ради.

Господи, помилуй. *(Трижды)*

Слава, и ныне:

Отче наш, Иже еси на небесех! Да святится имя Твое, да приидет Царствие Твое, да будет воля Твоя, яко на небеси и на земли. Хлеб наш насущный даждь нам днесь; и остави нам долги наша, якоже и мы оставляем должником нашим; и не введи нас во искушение, но избави нас от лукаваго.

Приидите, поклонимся Цареве нашему Богу.

Приидите, поклонимся и припадем Христу, Цареве нашему Богу.

Приидите, поклонимся и припадем Самому Христу, Цареве и Богу нашему.

Псалом 26

Господь просвещение мое и Спаситель мой, кого убоюся? Господь Защититель живота моего, от кого утрашуся? Внегда приблизатися на мя злобующим, еже снести плоти моя, оскорбляющии мя, и врази мои, тии изнемогоша и падоша. Аще ополчится на мя полк, не убоится сердце мое, аще восстанет на мя брань, на Него аз уповаю. Едино просих от Господа, то взыщу: еже жити ми в дому Господни вся дни живота моего, зрети ми красоту Господню и посещати храм святой Его. Яко скры мя в селении Своем в день зол моих, покры мя в тайне селения Своего, на камень вознесе мя. И ныне се вознесе главу мою, на враги моя: обыдох и пожрох в селении Его жертву хваления и воскликновения, пою и воспую Господеви. Услыши, Господи, глас мой, имже воззвах: помилуй мя и услыши мя. Тебе рече сердце мое, Господа взыщу. Взыска Тебе лице мое, лица Твоего, Господи, взыщу. Не отврати лица Твоего от мене и не уклонися гневом от раба Твоего: помощник мой буди, не отрини мене, и не остави мене, Боже Спасителю мой. Яко отец мой и мати моя остависта мя, Господь же восприят мя. Законоположи ми, Господи, в пути Твоем и настави мя на стезю правую враг моих ради. Не предаждь мене в души стужающих ми, яко восташа на мя свидетеле неправеднии и солга неправда себе. Верую видети благая Господня на земли живых. Потерпи Господа, мужайся и да крепится сердце твое, и потерпи Господа.

Псалом 31

Блажени, ихже оставишася беззакония и ихже прикрывашася греси. Блажен муж, емуже не вменит Господь греха, ниже есть во устех его лесь. Яко умолчах, обетшаша кости моя, от еже звати ми весь день. Яко день и ночь отяготе на мне рука Твоя, возвратихся на страсть, егда унзе ми терн. Беззаконие мое познах и греха моего не покрых, рех: исповем на мя беззаконие мое Господеви, и Ты оставил еси нечестие сердца моего. За то помолится к Тебе всяк преподобный во время благопотребно: обаче в потоке вод многих к нему не приблизатся. Ты еси прибежище мое от скорби обдержавшая мя: радости моя, избави мя от обышедших мя. Вразумлю тя и наставлю тя на путь сей, воньже пойдеш, утвержу на тя очи Мои. Не будите яко конь и мек, имже несть разума: броздами и уздою челюсти их востягнеши, не прибли-

жающихся к тебе. Многи раны грешному, уповающего же на Господа милость обыдет. Веселитесь о Господе, и радуйтесь, праведнии, и хвалитесь, вси правии сердцем.

Псалом 56

Помилуй мя, Боже, помилуй мя, яко на Тя упова душа моя, и на сень крилу Твоею надеюся, дондеже преидет беззаконие. Воззову к Богу Вышнему, Богу, благодеявшему мне. Посла с Небесе и спасе мя, даде в поношение попирающыя мя, посла Бог милость Свою и истину Свою, и избави душу мою от среды скимнов. Поспах смущен, сынове человечестии, зубы их оружия и стрелы, и язык их меч остр. Вознесися на Небеса, Боже, и по всей земли слава Твоя. Сеть уготоваша ногам моим и слякоша душу мою, ископаша пред лицом моим яму и впадоша в ню. Готово сердце мое, Боже, готово сердце мое, воспою и пою во славе моей. Востани слава моя, востани псалтирю и гусли, встану рано. Исповемся Тебе в людех, Господи, воспою Тебе во языцех, яко возвеличися до Небес милость Твоя, и даже до облак истина Твоя. Вознесися на Небеса, Боже, и по всей земли слава Твоя.

Псалом 33

Благословлю Господа на всякое время, выну хвала Его во устех моих. О Господе похвалится душа моя, да услышат кротцыи и возвеселятся. Возвеличьте Господа со мною и вознесем имя Его вкупе. Взысках Господа и услыша мя, и от всех скорбей моих избави мя. Приступите к Нему и просветитесь, и лица ваша не постыдятся. Сей нищий воззва, и Господь услыша и, и от всех скорбей его спасе и. Ополчится Ангел Господень окрест боящихся Его, и избавит их. Вкусите и видите, яко благ Господь; блажен муж, иже уповае на Нань. Бойтесь Господа, вси святии Его, яко несть лишения боящимся Его. Богатии обнищаша и взалкаша, взыскающии же Господа не лишатся всякаго блага. Приидите, чада, послушайте мене, страху Господню научу вас. Кто есть человек хотяй живот, любяй дни видети блага? Удержи язык твой от зла, и устне твои, еже не глаголати лъсти. Уклонися от зла и сотвори благо. Взыщи мира, и пожени и. Очи Господни на праведныя, и уши Его в молитву их. Лице же Господне, на творящыя злая, еже потребити от земли память их. Воззваша праведнии, и Господь услыша их, и от всех скорбей их избави их.

Близ Господь сокрушенных сердцем, и смиренныя духом спасет. Многи скорби праведным, и от всех их избавит я Господь. Хранит Господь вся кости их, ни единая от них сокрушится. Смерть грешников люта, и ненавидящии праведнаго прегрешат. Избавит Господь души раб Своих, и не прегрешат вси, уповающи на Него.

Слава, и ныне: Аллилуиа, аллилуиа, аллилуиа, слава Тебе Боже. *(Трижды)*

Господи помилуй. *(Трижды)*

Слава, и ныне:

Псалом 38

Рех: сохраню пути моя, еже не согрешати ми языком моим: положих устом моим хранило, внемгда востати грешному предо мною. Онемех и смирихся, и умолчах от благ, и болезнь моя обновися. Согрехя сердце мое во мне, и в поучении моем разгорится огонь. Глаголах языком моим: скажи ми, Господи, кончину мою и число дней моих, кое есть? Да разумею, что лишаюся аз? Се пяди положил еси дни моя, и состав мой яко ничтоже пред Тобою, обаче всяческая суета всяк человек живый. Убо образом ходит человек, обаче всеу мятется: сокровиществует, и не весть, кому соберет я. И ныне кто терпение мое, не Господь ли? И состав мой от Тебе есть. От всех беззаконий моих избави мя, поношение безумному дал мя еси. Онемех и не отверзох уст моих, яко Ты сотворил еси. Отстави от мене раны Твоя: от крепости бо руки Твоя аз исчезох. Во обличениях о беззаконии наказал еси человека и истаял еси, яко паучину, душу его: обаче всеу всяк человек. Услыши молитву мою, Господи, и моление мое внуши, слез моих не премолчи: яко пресельник аз есмь у Тебе и пришлец, якоже вси отцы мои. Ослаби ми, да почию, прежде даже не отъиду, и ктому не буду.

Псалом 40

Блажен разумевай на нища и убога, в день лют избавит его Господь. Господь да сохранит его и живит его, и да ублажит его на земли, и да не предаст его в руки врагов его. Господь да поможет ему на одре болезни его: все ложе его обратил еси в болезни его. Аз рех: Господи, помилуй мя, исцели

душу мою, яко согреших Ти. Врази мои реша мне злая: когда умрет и погибнет имя его? И вхождаше видети, всуе глаголаше сердце его, собра беззаконие себе, исхождаше вон и глаголаше вкупе. На мя шептаху вси врази мои, на мя помышляху злая мне. Слово законопреступное возложиша на мя: еда спяй не приложит воскреснути? Ибо человек мира моего, на негоже уповах, ядый хлебы моя, возвеличи на мя запинание. Ты же, Господи, помилуй мя и возстави мя и воздам им. В сем познах, яко восхотел мя еси, яко не возрадуется враг мой о мне. Мене же за незлобие приял и утвердил мя еси пред Тобою в век. Благословен Господь Бог Израилев от века и до века: буди, буди.

Псалом 69

Боже, в помощь мою вонми, Господи, помощи ми потщися. Да постыдятся и посрамятся ищущии душу мою, да возвратятся вспять и постыдятся хотящии ми злая. Да возвратятся абие стыдящися глаголющии ми: благоже, благоже. Да возрадуются и возвеселятся о Тебе вси ищущии Тебе, Боже, и да глаголют выну, да возвеличится Господь, любящии спасение Твое: аз же нищ есмь и убог, Боже, помози ми: Помощник мой и Избавитель мой еси Ты, Господи, не закосни.

Псалом 70

На Тя, Господи, уповах, да не постыжуся в век. Правдою Твоею избави мя и изми мя, приклони ко мне ухо Твое и спаси мя. Буди ми в Бога Защитителя и в место крепко спасти мя, яко утверждение мое и прибежище мое еси Ты. Боже мой, избави мя из руки грешнаго, из руки законопреступнаго и обидящаго, яко Ты еси терпение мое, Господи, Господи, упование мое от юности моя. В Тебе утвердихся от утробы, от чрева матере моя Ты еси мой покровитель: о Тебе пение мое выну. Яко чудо бых многим, и Ты помощник мой крепок. Да исполнятся уста моя хваления, яко да воспою славу Твою, весь день великолепие Твое. Не отвержи мене во время старости, внемда оскудевати крепости моей, не остави мене. Яко реша врази мои мне, и стерегущии душу мою совещааша вкупе, глаголюще: Бог оставил есть его, пожените и имите его, яко несть избавляяй. Боже мой, не удалися от мене, Боже мой, в помощь мою вонми. Да постыдятся и исчезнут оклеветающии душу мою, да облекутся в стыд и срам ищущии злая мне. Аз же всегда возуповаю на Тя и

приложу на всяку похвалу Твою. Уста моя возвестят правду Твою, весь день спасение Твое, яко не познах книжная. Вниду в силе Господни, Господи, помяну правду Тебе Единаго. Боже мой, имже научил мя еси от юности моя, и до ныне возвещу чудеса Твоя, и даже до старости и престарения, Боже мой, не остави мене, дондеже возвещу мышцу Твою роду всему грядущему, силу Твою и правду Твою, Боже, даже до вышних, яже сотворил ми еси величия. Боже, кто подобен Тебе? Елики явил ми еси скорби многи и злы, и обращаеся оживотворил мя еси, и от бездн земли возвел мя еси. Умножил еси на мне величествие Твое, и обращаеся утешил мя еси, и от бездн земли паки возвел мя еси. Ибо аз исповемся Тебе в людех, Господи, в сосудех псаломских истину Твою, Боже, воспою Тебе в гуслех, Святой Израилев. Возрадуется устне мои, егда воспою Тебе, и душа моя, юже еси избавил. Еще же и язык мой весь день поучится правде Твоей, егда постыдятся и посрамятся ищущии злая мне.

Слава, и ныне: Аллилуия, аллилуия, аллилуия, слава Тебе Боже. *(Трижды)*

Господи помилуй. *(Трижды)*

Слава, и ныне:

Псалом 76

Гласом моим ко Господу возвах, гласом моим к Богу, и внят ми. В день скорби моя Бога взысках руками моима, ношью пред Ним, и не прельщен бых. Отвержеся утешитися душа моя. Помянух Бога и возвеселихся, поглумляхся и малодушествоваше дух мой. Предваристе стражбы очи мои: смятохся и не глаголах. Помыслих дни первыя, и лета вечная помянух, и поучахся: ношью сердцем моим глумляхся, и тужаше дух мой: еда во веки отринет Господь, и не приложит благоволити паки? Или до конца милость Свою отсечет, сконча глагол от рода в род? Еда забудет ущедрити Бог? Или удержит во гневе Своем щедроты Своя? И рех, ныне начах: сия измена десницы Вышняго. Помянух дела Господня, яко помяну от начала чудеса Твоя, и поучуся во всех делех Твоих, и в начинаниих Твоих поглумлюся. Боже, во святем путь Твой: кто бог велий яко Бог наш? Ты еси Бог творяй чудеса: сказал еси в людех силу Твою, избавил еси мышцею Твоею люди Твоя, сыны Иаковли и Иосифовы. Видеша Тя воды, Боже, видеша Тя воды, и убояшася:

смятошася бездны, множество шума вод, глас даша облацы, ибо стрелы Твоя преходят. Глас грома Твоего в колеси, осветиша молния Твоя вселенную: подвижеся и трепетна бысть земля. В мори путие Твои, и стези Твоя в водах многих, и следы Твои не познаются. Наставил еси яко овцы люди Твоя рукою Моисевою и Ааронею.

Псалом 101

Господи, услыши молитву мою, и вопль мой к Тебе да приидет. Не отврати лица Твоего от мене: воньже аще день скорблю, приклони ко мне ухо Твое: воньже аще день призову Тя, скоро услыши мя. Яко исчезоша яко дым дние мои, и кости моя яко сушило сосхошася. Уязвен бых яко трава, и изсше сердце мое, яко забых снести хлеб мой. От гласа воздыхания моего прильпе кость моя плоти моей. Уподобихся неясоти пустынной, бых яко ночный вран на нырищи. Бдех и бых яко птица особящаяся на зде. Весь день поношаху ми врази мои, и хвалящии мя мною кленяхуся. Зане пепел яко хлеб ядях, и питие мое с плачем растворях. От лица гнева Твоего и ярости Твоея: яко вознес низвергл мя еси. Дние мои яко сень уклонишася, и аз яко сено иссох. Ты же, Господи, во век пребываеши, и память Твоя в род и род. Ты воскрес ущедрити Сиона, яко время ущедрити его, яко прииде время. Яко благоволиша раби Твои камене его, и персть его ущедрят. И убоятся языцы имене Господня, и вси царие земстии славы Твоея. Яко созиждет Господь Сиона, и явится во славе Своей. Призре на молитву смиренных, и не уничижи моления их. Да напишется сие в род ин, и людие зиждемии восхвалят Господа. Яко приниче с высоты святыя Своея, Господь с Небесе на землю призре, услышати воздыхание окованных, разрешити сыны умерщвленных, возвестити в Сионе имя Господне, и хвалу Его во Иерусалиме. Внегда собратися людем вкупе и царем, еже работати Господеви. Отвеща ему на пути крепости его, умаление дней моих возвести ми. Не возведи мене во преполовление дней моих: в роде родов лета Твоя. В началех Ты, Господи, землю основал еси, и дела руку Твоею суть небеса. Та погибнут, Ты же пребываеши, и вся яко риза обетшают, и яко одежду свиеша я, и изменятся. Ты же тойжде еси, и лета Твоя не оскудеют. Сынове раб Твоих вселятся, и семя их во век исправится.

Псалом 90

Живый в помощи Вышняго, в крове Бога Небеснаго водворится. Речет Господеви: Заступник мой еси и Прибежище мое, Бог мой, и уповаю на Него. Яко Той избавит тя от сети ловчи, и от словесе мятежна, плещма Своима осенит тя, и под криле Его надеешься: оружием обыдет тя истина Его. Не убоишися от страха ночнаго, от стрелы летящия во дни, от вещи во тме преходящия, от сряща, и беса полуденнаго. Падет от страны твоя тысяща, и тма одесную тебе, к тебе же не приблизится, обаче очима твоима смотриши, и воздаяние грешников узриши. Яко Ты, Господи, упование мое, Вышняго положил еси прибежище твое. Не приидет к тебе зло, и рана не приблизится телеси твоему, яко Ангелом Своим заповесть о тебе, сохранити тя во всех путех твоих. На руках возмут тя, да не когда преткнеши о камень ногу твою, на аспида и василиска наступиши, и попереши льва и змия. Яко на Мя упова, и избавлю и: покрыю и, яко позна имя Мое. Воззовет ко Мне, и услышу его, с ним есмь в скорби, изму его, и прославлю его, долготою дней исполню его, и явлю ему спасение Мое.

Псалом 50

Помилуй мя, Боже, по велицей милости Твоей, и по множеству щедрот Твоих очисти беззаконие мое. Наипаче омой мя от беззакония моего, и от греха моего очисти мя. Яко беззаконие мое аз знаю, и грех мой предо мною есть выну. Тебе Единому согреших и лукавое пред Тобою сотворих, яко да оправдишися во словесех Твоих, и победиши внегда судити Ти. Се бо в беззакониих зачат есмь, и во гресех роди мя мати моя. Се бо истину возлюбил еси, безвестная и тайная премудрости Твоя явил ми еси. Окропиши мя иссопом, и очищуся, омыеши мя, и паче снега убелюся. Слуху моему даси радость и веселие, возрадуются кости смиренныя. Отврати лице Твое от грех моих и вся беззакония моя очисти. Сердце чисто созижди во мне, Боже, и дух прав обнови во утробе моей. Не отвержи мене от лица Твоего, и Духа Твоего Святаго не отыми от мене. Воздаждь ми радость спасения Твоего, и Духом владычним утверди мя. Научу беззаконныя путем Твоим, и нечестивии к Тебе обратятся. Избави мя от кровей, Боже, Боже спасения моего, возрадуется язык мой правде Твоей. Господи, устне мои отверзеши, и уста моя возвестят хвалу Твою. Яко аще бы восхотел еси жертвы, дал бых убо: всесожжения не благоволиши. Жертва Богу дух сокрушен: сердце сокрушенно и смиренно Бог не уничижит. Ублажи, Господи, благоволением Твоим Сиона, и да сози-

ждутся стены Иерусалимския. Тогда благоволиши жертву правды, возношение и всесожегаемая: тогда возложат на олтарь Твой тельцы.

Слава, и ныне: Аллилуиа, аллилуия, аллилуиа, слава Тебе Боже. (*Трижды*)

Таже: Великая ектения.

И абие поется во глас 1:

Бог Господь, и явися нам, благословен Грядый во имя Господне.

Стих 1: Исповедайтеся Господеви, яко благ, яко в век милость Его.

Стих 2: Обышедше обыдоша мя, и именем Господним противляхся им.

Стих 3: Не умру, но жив буду, и повем дела Господня.

Стих 4: Камень, Егоже небрегоша зиждушии, Сей бысть во главу угла: от Господа бысть Сей, и есть дивен во очесех наших.

Тропарь, глас 1

Егда приидеши, Боже, на землю со славою, / и трепещут всяческая: / река же огненная пред судищем влечет, / книги разгибаются, и тайная являються, / тогда избави мя от огня неугасимаго / и сподоби мя одесную Тебе стати, Судие Праведнейший.

Слава, и ныне: *Богородичен:*

Час испытания и страшнаго пришествия Человеколюбца Владыки помышляя, / весь трепещу и, сетуя, вопию Ти: / Судие мой Праведнейший и Едине Многомилостиве, / кающася приими мя, Богородицы молитвами.

КАНОН ПОКАЯННЫЙ КО ГОСПОДУ НАШЕМУ ИИСУСУ ХРИСТУ

Глас 8

Песнь 1

Ирмос: Воду прошед яко сушу, / и египетскаго зла избежав, / израильтянин, вопияше: / Избавителю и Богу нашему поим.

Припев: **Помилуй мя, Боже, помилуй мя.**

Ныне приступих аз грешный и обремененный / к Тебе, Владыце и Богу моему; / не смею же взирати на небо, / токмо молюся, глаголя: / даждь ми, Господи, ум, да плачуся дел моих горько.

О, горе мне, грешному! / Паче всех человек окаянен есмь, / покаяния несть во мне; / даждь ми, Господи, слезы, / да плачуся дел моих горько.

Слава: Безумне, окаянне человеце, / в лености время губиши; / помысли житие твое и обратися ко Господу Богу, / и плачися о делех твоих горько.

И ныне: Мати Божия Пречистая, / воззри на мя грешнаго, / и от сети диаволи избави мя, / и на путь покаяния настави мя, / да плачуся дел моих горько.

Песнь 3

Ирмос: Небеснаго круга Верхотворче Господи, / и Церкви Зиждителю, / Ты мене утверди в любви Твоей, / желаний краю, верных утверждение, / едине Человеколюбче.

Внегда поставлени будут престоли на судищи страшнем, / тогда всех человек дела обличатся; / горе тамо будет грешным, в муку отсылаемым; / и то ведущи, душе моя, / покайся от злых дел твоих.

Праведницы возрадуются, а грешнии восплачутся, / тогда никтоже может помощи нам, / но дела наша осудят нас; / темже прежде конца покайся от злых дел твоих.

Слава: Увы мне великогрешному, / иже дела и мысльми осквернився, / ни капли слез имею от жестосердия; / ныне возникни от земли, душе моя, / и покайся от злых дел твоих.

И ныне: Се, взывает, Госпоже, Сын Твой, / и поучает нас на доброе, / аз же грешный добра всегда бегаю; / но Ты, Милостивая, помилуй мя, / да покаюся от злых моих дел.

Катавасия, также малая ектения. По возгласе поем:

Седален, глас 6

Помышляю день страшный / и плачуся деяний моих лукавых: како отвещаю Безсмертному Царю, / или коим дерзновением / воззрю на Судию, блудный аз? / Благоутробный Отче, / Сыне Единородный и Душе Святой, помилуй мя.

Слава, и ныне: Богородичен

Связан многими ныне пленицами грехов / и содержимь лютыми страстьми и бедами, / к Тебе прибегаю, моему спасению, / и вопию: помози ми, Дево, Мати Божия.

Песнь 4

Ирмос: Услышах, Господи, / смотрения Твоего таинство, / разумех дела Твоя / и прославих Твое Божество.

Широк путь zde и угодный сласти творити, / но горько будет в последний день, / егда душа от тела разлучатися будет: / блюдися от сих, человече, Царствия ради Божия.

Почто убогаго обидиши, / мзду наемничу удержиши, / брата твоего не любиши, / блуд и гордость гониши? / Остави убо сия, душе моя, / и покайся Царствия ради Божия.

Слава: О, безумный человече, доколе углебаеши, яко пчела, / собирающа богатство твое? / Вскоре бо погибнет, яко прах и пепел: но / более взыщи Царствия Божия.

И ныне: Госпоже Богородице, помилуй мя грешнаго, / и в добродетели укрепи, и соблюди мя, / да наглая смерть не похитит мя неготоваго, / и доведи мя, Дево, Царствия Божия.

Песнь 5

Ирмос: Просвети нас повелении Твоими, Господи, / и мышцею Твоею высокою / Твой мир подаждь нам, / Человеколюбче.

Вспомяни, окаянный человеце / како лжам, клеветам, / разбою, немощем, лютым зверем, / грехов ради порабощен еси; / душе моя грешная, того ли восхотела еси?

Трепещут ми уди, / всеми бо сотворих вину: / очима взирай, ушима слышай, языком злая глаголай, / всего себе геенне предай; / душе моя грешная, сего ли восхотела еси?

Слава: Блудника и разбойника кающаяся приял еси, Спасе, / аз же единленостию греховною отягчихся / и злым делом поработихся; / душе моя грешная, сего ли восхотела еси?

И ныне: Дивная и скорая помощнице всем человеком, / Мати Божия / помози мне недостойному, / душа бо моя грешная того восхоте.

Песнь 6

Ирмос: Молитву пролию ко Господу, / и Тому возведу печали моя, / яко зол душа моя исполнися, / и живот мой аду приближися, / и молюся яко Иоанна: / от тли, Боже, возведи мя.

Житие на земли блудно пожих / и душу во тьму предах, / ныне убо молю Тя, Милостивый Владыко: / свободи мя от работы сея вражия, / и даждь ми разум творити волю Твою.

Кто творит таковая, якоже аз? / Якоже бо свиния лежит в калу, / тако и аз греху служу. / Но Ты, Господи, исторгни мя от гнуса сего / и даждь ми сердце творити заповеди Твоя.

Слава: Воспряни, окаянный человече, к Богу, / вспомянув своя согрешения, / припадая ко Творцу, слезя и стенья; / Той же, яко милосерд, / даст ти ум знати волю Свою.

И ныне: Богородице Дево, / от видимаго и невидимаго зла сохрани мя, Пречистая, / и приими молитвы моя, и донеси я Сыну Твоему, да даст ми ум творити волю Его.

Катавасия, таже малая ектеня. По возгласе абие читется акафист.

АКАФИСТ
В ПАМЯТЬ ВСЕОБЩЕГО ВОСКРЕСЕНИЯ
И СТРАШНОГО СУДА

Кондак 1

Предвечный Царю веков, Творче и Господи, Судие Праведнейший и нелицеприятный, множество содеянных мною лютых помышляя, окаянный аз, трепещу Страшного Дня Судного, но, надеясь на милость неизреченного благоутробия Твоего, давидски молю Тя: по велицей Твоей милости прости мя недостойнаго, и не осуди мя по деянием моим, яко да благою совестью очищен, на всяк день и час Ангельскую песнь приношу Ти: Свят, Свят, Свят еси, Господи, Боже Вседержителю, Иже бе и сый и грядый, помилуй мя!

Икос 1

Архангельския трубы возгласение, на Суд Господень Страшный и Последний, живыя и мертвыя от всех конец земли собирающее, уже во ушесех предносится. Душе моя, душе моя, востани, что спиши? Конец приближается, и имаши смутитися. Воспрями убо, яко мало есть еще время на покаяние; бодрствуй, молися и трезвися и дела добрая твори, непрестанно вопиючи ко Владыце своему таковая:

Свят еси, Господи, Боже наш, и Пресвят, и да святится и в сем грешном и во зле лежащем мире имя Твое, паче всякаго имене.

Свят еси, Господи, Боже наш, да приидет Твое славное Царствие.

Свят еси, Господи, Боже наш, да будет во всем воля Твоя святая на земли, якоже пребывает и на небеси.

Свят еси, Господи, Боже наш, хлеб земный насущный даяй нам, паче же небесный даждь ми на всяк день.

Свят еси, Господи, Боже наш, остави ми согрешения моя, якоже и аз оставляю брату своему согрешения его.

Свят еси, Господи, Боже наш, не введи мя в напасть, но избави мя от сетей лукаваго миродержителя тьмы века сего, ибо поистине опасно ходим и дние наша лукави суть.

Свят, Свят, Свят еси, Господи, Боже Вседержителю, Иже бе и сый и грядый, помилуй мя!

Кондак 2

Вижду, Господи мой, Господи, яко вся знамения кончины века сего уже исполняются: вера святая в людех оскуде, беззакония умножишася, и любовь охладе; встают бо народ на народ, царство на царство, отец на сына и сын на отца, глады и трусы и пагубы изобилуют по местом, прельстители и предатели явишася, и гонения на верных Твоих воздвигошася, таже и проповедание Евангелия во свидетельство всем языком уже совершается, и скорбь великая посреди верных по вселенней распространяется, и по сих всех, разумея, яко близ есть кончина века сего, со страхом вопию Ти: Аллилуиа.

Икос 2

Разум неуразуменный времени страшнаго и неизглаголаннаго пришествия Твоего открыти верным хотя, Всеблагий Господи, дал еси нам в подобие того притчу смоковницы, глаголя: егда бо ваия ея будут млади и листвие прозябнет, ведите, яко близ есть лето. Тако и вы, егда видите сия вся, - бодрствуйте, яко близ есть, при дверех. Тем же и мы, пришед на конец веков, со умилением зовем Ти:

Свят еси, Господи, Боже наш, притчами тайноводя нас во Царствие Свое, да всяк имеяй уши духовныя слышати, да слышит, даруй и мне уразумение Твоего евангельскаго проповедания, да плотския похоти попраше, духовно жительствую и к жатве всемирной уготовляюся.

Свят еси, Господи, Боже наш, притчею жерновною поучай нас, яко от двоих, вкупе труждающихся и живущих, в той день един поемлется и един оставляется, - не остави мене тогда со грешники, делающими беззаконие, но очищение даруй и введи во Твое славное Царствие.

Свят еси, Господи, Боже наш, глаголяй: молитесь, да не будет бегство ваше в зиме или в субботу, о вѣце кончины мира, яко о зиме гадательствуя; даждь ми, в сие осьмое тысячелетие живущему, стопы моя к бегству великому в сретение Твое уготовати и непрестанно помышляти грядущее помози ми.

Свят еси, Господи, Боже наш, рекий: в чем застану, в том и сужду, - возбуди мя, множицею во грехи впадающа, к частому покаянню, да не обрящеши, пришед, мя неготоваго.

Свят еси, Господи, Боже наш, Праведный и Милостивый, не вниди в суд с рабом Твоим, яко не оправдится пред Тобою всяк живой, - от лица же Твоего судьба моя изыдет.

Свят еси, Господи, Боже наш, рекий: не всяк глаголяй Ми: Господи, Господи, внидет в Царствие Небесное, но творяй волю Отца Моего, - научи мя творити волю Твою.

Свят, Свят, Свят еси, Господи, Боже Вседержителю, Иже бе и сый и грядый, помилуй мя!

Кондак 3

Силою Божества Твоего, Господи, воздвигл еси из гроба Лазаря, бездыханна четверодневна, и телеса усопших святых в час смерти и крестных страданий Твоих возставил еси; последи же и Сам тридневен воскресл еси от мертвых тою же силою Твоею. Веруем, яко грядет час и ныне уже есть, егда по гласу Твоему воскреснут мертвии, и востанут сущии во гробех, и изыдут сотворшии благая в воскрешение живота, а сотворшии злая в воскрешение суда. Не осуди тогда и мя, Владыко, по деянием моим, но помилуй со всеми в вере и надежде жизни вечныя усопшими, и пети не возбрани: Аллилуия.

Икос 3

Имеяй ключи ада и смерти, аще и глаголал еси, Господи, верному рабу Твоему Иоанну тайновидцу, стоявшему посреде седми светильников: Аз есмь Первый и Последний, и живой, и бых мертв, и се жив есмь во веки веков, аминь, - повелел же еси ему написати имже подобает быти вскоре. Сия

страшная и близкая скончания мира сего быти помышляя, не с суетным любопытством, но со страхом и трепетом взываю Ти:

Свят еси, Господи, Боже наш, Свидетелю верный, Первенец из мертвых, и Княже царей земных; любяй ны и омываяй ны от грех наших Кровию Своею, и ключи Царствия Небеснаго человеком вручивый, - укрепи мя в вере Твоей, да николиже отрекуся Тебе, но, аще понудитися, до крове постою за имя святое Твое.

Свят еси, Господи, Боже наш, грядый на облацех небесных, да узрят Его всяко око и иже прободоша Его, и плачь сотворят о Нем тогда вся колена земная, - даруй и мне прежде дне того страшнаго плачь за грехи моя.

Свят еси, Господи, Боже наш - Альфа и Омега, начало и конец, Первый и Последний - скажи ми кончину мою и число дней моих возвести ми.

Свят еси, Господи, Боже наш, давый Откровение великому Иоанну, да уразумеем и мы, имже подобает быти вскоре. Того молитвами спаси мя в день великий гнева Твоего, егда ни горы, ни ущелья, ни камение возмогут укрыти грешники, бежация от лица Твоего.

Свят еси, Господи, Боже наш, апостолом Твоим Павлом поучаяй, яко аще имам пророчества и тайны вся и веру, якоже и горы преставляти, любве же не имам, кая ми польза есть? Дажь ми любовь нелицемерну, да тяготу брата моего, якоже и свою, понесу, и душу мою положу за други своя.

Свят еси, Господи, Боже наш, Любы неизреченная, даруй ми возлюбити Тя, якоже иногда возлюбих грех свой, и принеся плоды покаяния, сподоби поработати Тебе, якоже поработах прежде сатане льстивому, да из глубины души воспою:

Свят, Свят, Свят еси, Господи, Боже Вседержителю, Иже бе и сый и грядый, помилуй мя!

Кондак 4

Буря велия, разрушающая горы, предъидяше, трус и мрак, громы и молнии бываху, егда являлся Господь Илии в Хориве и Моисею на Синае; но сей страх малый есть прообраз последняго дне мира, о немже глаголаше Господь учеником на горе Елеонстей и Иоанну на Патмосе. Тогда бо вся вселенная

сотрясется: огонь, вода и вся стихии смятутся; и свет, и мрак, и кровь, и дым, и трубы Ангельския, и мертвецов востание, и вопль людей соединятся, возвещающая Второе пришествие и Страшный Суд Его, и час отмщения. О, ужасного зрелища и испытания! Невозможно есть нам и изобразить сие: горе - грешным, и слава - праведным тогда. Милосерде Господи! Спаси мя тогда, молюся, да пою Ти: Аллилуиа.

Икос 4

Слышах Тя, Господи, усты Петровы глаголюща: яко нынешняя небеса и нынешняя земля Словом Твоим содержимы и огню блюдомы на День Суда и погибели нечестивых человек, аз содрогаюся, но на неизреченное милосердие Твое дерзая, новаго небеси и новыя земли по неложному Твоему обетованию чаю, в них же вся правда живет. Сия убо желанныя земли жителя мя сотвори тогда, Спасе, зовуща:

Свят еси, Господи, Боже наш, неизследимый и непременимый вчера и днешь и во веки Той же еси, и лета Твоя не оскудеют; имей небеса и землю, яко ризу ветху сняти, в ризу нову и нетленну облецы мя.

Свят еси, Господи, Боже наш, стой у двери и стучай, и к слышащему глас Твой, и двери сердца отверзающему - входящий к нему и свечеряющий с ним. Вниди в дом смиренныя и грешныя души моя и свечеряй со мною, якоже с Лукою и Клеопою, ибо преклонился уже есть день жизни моя.

Свят еси, Господи, Боже наш, Путь, Истина и Живот мой, настави мя на путь Твой, и пойду во истине Твоей.

Свят еси, Господи, Боже наш, рекий древле: Марфо, Марфо, печешися и молвиши о мнозе, едино же есть на потребу, - даждь и ми ни о едином земном пещися, но и о небесном помышляти.

Свят еси, Господи, Боже наш, рекий богатому: безумне! В сию же ночь душу твою истяжут от Тебе, а еже уготовал еси кому будет? Помози ми сокровище не земное, а небесное собирати, идеже ни червь, ни тля тлит, ни татие подкапывают и крадут.

Свят еси, Господи, Боже наш, освяти мя во всей полноте Своей, да все-совершен дух мой и душа и тело непорочно в пришествие Твое да сохранят-ся.

Свят, Свят, Свят еси, Господи, Боже Вседержителю, Иже бе и сый и грядый, помилуй мя!

Кондак 5

Боже, Боже мой, пришедый взискати и спасти погибшаго, - призри на скорбь души моя: век бо мой скончается, и Страшный Твой Престол предуготовляется, житие мое мимоидет, Суд же мне предлежит, грозя мне огненною мукою и пламенем неугасимым. Вонми, убо, молитве моей и не отрини слез моих, яко суетных: кто убо прииде к Тебе плача и не абие спасен бысть? Веру мою вместо дел вмени мне, Господи, и не взыщи дел, отнюдь оправдающих мя, яко тщуся творити тыя, но не имам их; но та вера моя да довлеет вместо всех, та да отвещает, та да оправдит, та да покажет мя причастника славы Твоя вечныя в невечернем дни Царствия Твоего, воспевающа: Аллилуия.

Икос 5

Провидя Даниил пророк, муж желаний, древле ясно Божественное Твое Второе пришествие, Владыко Господи, глагола: дондеже престолы поставишася, и Ветхий денми седе, одежды Его белы, аки снег, и власы главы Его, аки волна, чисты, и Престол Его пламень палящ; река огненная течет исходящи пред Ним; тысяща тысящ служаху Ему, и тмы тем предстояху Ему, на судищи сидящему, и книги отверзошася. Пощади убо, пощади, Спасе, тогда Твое создание, слезно вопиющее Ти таковая:

Свят еси, Господи, Боже наш, на Престоле Славы почиваяй, Ему же дадеся власть и честь, и Царство, и вси людие; племена и языцы Тому работают; Его же власть - власть вечная, яже не преидет, и Царство Его не разсыплется.

Свят еси, Господи, Боже наш, Великий и Страшный, Его же Даниил пророк святой виде, духом вострепета и смутися, - аз же, грешный, како дерзну узрети Тя и отвещати Тебе?

Свят еси, Господи, Боже наш, Боже милости и щедрот и человеколюбия, - молитвами Пророка Твоего избави мя потока страшнаго реки огненныя, хотящаго поглотити мя за грехи моя.

Свят еси, Господи, Боже наш, праведныя любяй и грешныя милуяй, горы мерилем разума поставивый, лик звездам исчитаяй и капли росныя ко ветров дыханию приложивый, - услыши стенание души моея, и вопль сердца моего к Тебе да приидет.

Свят еси, Господи, Боже наш, Сердцеведче, Ему же вся, не токмо слова, но чувства и помышления содеянныя и несодеянныя наша ведомы суть, - не осуди мя по благодати Твоей за всякое слово праздное и помыслы скверныя, яже аз изрекох и помыслих в житии моем.

Свят еси, Господи, Боже наш, продолжи ми век к покаянию и на посещение со смоковницею бесплодною не осуди мене.

Свят, Свят, Свят еси, Господи, Боже Вседержителю, Иже бе и сый и грядый, помилуй мя!

Кондак 6

Проповедник Твой, Господи, духоносный Иоанн Богослов, видево откровении славный Престол Небесный и под Престолом души убиенных за слово Божие, от великия скорби пришедших, иже и возопиша велегласно глаголюще: доколе, Владыко Святыи и Истинный, не осудиши и не отмстиши за кровь нашу живущим на земли? и даны быша коемуждо им ризы белы, и заповедано бысть им пождати еще время мало, дондеже скончаются соратницы их, подобно им имущия избиены быти, яко да восполнится предопределенное число. О, великаго и неизреченнаго долготерпения Твоего, Владыко! Яко и до сего дне отмщение нечестивым отлагаеши. Но горе миру, егда Судия внезапно приидет и коегождо деяния обнажатся, тогда погибнут грешницы от лица Божия, а праведницы возвеселятся и возрадуются пред Богом во веки зовуще Ему: Аллилуия.

Икос 6

Возсиял еси на Фаворе, Христе Боже наш, и ученицы Твоя, елика вмещаху, славу Твою видеша; но и убояшася, и вострепеташа, и ниц падоша. С тою же неизреченною, но пребольшею всею славою приидеши на облацех в день он судити живых и мертвых, и явиши знамение великое, иже есть Крест Твой Честный, от конец земли и до конец небес простираяйся; егоже узревше, восплачут вся колена земная, ибо страх явления Лица Твоего земнородным страшнее по премногу есть всякаго в мире сем разрушения и пременения. Како срету Тя тогда, Боже мой, кий плач и ответ воздам Ти, не могий, бедный, вместити и иоты славы Твоея. Но на Твое несказанное милосердие уповая, всякий грех истинно кающагося побеждающее, дерзаю прежде конца возопити Ти:

Свят еси, Господи, Боже наш, во свете живой неприступнем, - осени мя, грешнаго, светом Лица Твоего, и не опали огнем Божества Твоего, егда приидеши во Славе святых Своей.

Свят еси, Господи, Боже наш, давая знамения на небеси и на земли, посылаяй огонь, язву и глад на люди за множество беззаконий их, - сохрани мя от язв будущих и от чаши гнева Твоего проклятия, приключитися имущих в последнии дни мира сего.

Свят еси, Господи, Боже наш, Слове необыменный, даруй ми слово благо отвечаати на Страшнем Суде Твоем.

Свят еси, Господи, Боже наш, глаголяй: побеждаяй наследит вся, и буду Ему Бог, и той мне будет в сына, - помози мне греха победителем явитися.

Свят еси, Господи, Боже наш, рекий: яко страшливых и неверных, скверных, убийц и блудодейц, идолослужителей и всех лживых часть в езере, горящем огнем и серою, ожидает, - спаси и избави мя от части тоя.

Свят, Свят, Свят еси, Господи, Боже Вседержителю, Иже бе и сый и грядый, помилуй мя!

Кондак 7

Хотящу Ти, о, Преблагословенный Господи Иисусе Христе, Боже наш, в день пакибытия, во Второе пришествие, явитися миру на облацех яко Судии

и Мздовоздаятелю, - о, каковый Страшный Суд будет тогда, Ангелом во тьмах и тысящах предстоящим, Апостолом председящим, человеком во ужасе вводимым, книгам разгибаемым и делом и помыслом истязуемым? Кий суд будет мне, зачатоу во гресех? Кто ми пламень, жгущий мя, угасит? Кто ми тьму просветит? Кто мя тогда защитит, аще не Ты Сам - Любы и Милость безконечная! Молитвами Пречистыя Матери Твояе и Ангела-хранителя моего спаси мя тогда, зовуща: Аллилуия.

Икос 7

Новое и последнее торжество явити сатане льстивому в мире попустивый, Владыко мой Господи, егда пред кончиною века сего открытсся человек беззакония, сын погибели, сиречь - антихрист, егоже пришествие со всякою силою и знаменями и чудесы ложными будет; иже, число звериное имеяй, совратит многия люди от пути праваго, и печать свою страшную на тыя положит, гонение на верныя великое воздвигнет и мерзость запустения на месте святе поставит, и три лета с половиною владычествовати будет, егоже и последи убиеши Духом уст Своих. О, горе мне, грешному, в день той тогда! Како спасение обрящу и отцу лжи противостану, когда избранных часть прельстится и праведник едва спасетсся? Но, о, Премилостиве! Аще и не понесох тяготы и зноя дневнаго, обаче с наемники единонадесятаго часа сопричти мя и веру крепку во дни искушений во мне утверди, да зову Ти такая:

Свят еси, Господи, Боже наш, по неизреченному промыслению Твоему попустити имеяй в последнии дни воцаритися сыну гордому и погибельному, да верныя прославятся, неверныя же в конец посрамятсся.

Свят еси, Господи, Боже наш, два свидетеля тогда с небесе послати имеяй, да избранныя укрепят и антихристу окаяннному противостанут, и истину Твою смертию своею засвидетельствуют.

Свят еси, Господи, Боже наш, прежде всех предрекий нам сия, быти подобающая, да зрим и не ужасаемсся, и, избранных ради, сократити дни оныя хотяй.

Свят еси, Господи, Боже наш, в терпении души нам стяжати заповедавый и до конца сия претерпевшему спасение обещаваый, - посли и мне дух кротости и терпения с упованием перенести напасти твоя.

Свят еси, Господи, Боже наш, изми мя тогда от сетей лукавого века сего и печати антихристовы избави мя.

Свят еси, Господи, Боже наш, сохрани мя в малом стаде Твоем, имже дати Царство благоволил еси.

Свят, Свят, Свят еси, Господи, Боже Вседержителю, Иже бе и сый и грядый, помилуй мя!

Кондак 8

Страннаго и страшнаго Втораго Твоего, Господи, пришествия помышляя сретение, трепещу, прещения Твоего боюся и гнева Твоего. Егда приидиши грешныя мучити, праведныя же спасти, - плачу и рыдаю, день оный воспоминаая, и молю Тя прежде сего: Спасе мой, спаси мя! Да не прииду тогда в землю плача, да не вижду места тьмы, Христе Спасе мой! Ниже связан буду рукама и ногама вне чертога Твоего изверженный, одежду нетления имый оскверненную и не могый проглаголати, якоже глаголю Ти ныне: Аллилуиа.

Икос 8

Весь еси желание и сладость моя, Сладчайший Господи Иисусе, Упование всех концов земли. Поучаеши ныне о дне славнаго пришествия Твоего, глаголя: бдите и молитесь, не весте бо дне и часа, вонже Сын Человеческий приидет. Сие же ведите: яко аще ведал бы домовладыка, в кую стражу нощи тать приидет - бдел бых убо и не бы дал подкопати храма своего; сего ради и вы будите готови. Внимая убо сему словеси Твоему, благодарне взываю Ти:

Свят еси, Господи, Боже наш, на всякое время и на всякий час бдети и ожидать дне великаго пришествия Твоего верным повелевый.

Свят еси, Господи, Боже наш, о дне том и часе никому не открывый: ни людем праведным, ниже Ангелом Своим. Но якоже молния исходит от вос-

ток и является до запад, тако пришествие Свое, имущее быти яве и внезапно, изобразивый.

Свят еси, Господи, Боже наш, обновивый водою во дни Ноя мир, грехами растлевший, егда внезапно потопаи люди нечестивыя, ныне же огнем попалиши хотяй землю беззаконную с человеки неверными.

Свят еси, Господи, Боже наш, правы пути Твоя и словеса Твоя истинны и непреложны и не мимо идут они, аще небо и земля прейдут.

Свят еси, Господи, Боже наш, не даждь ми отягчити сердце мое объядением, пьянством и печальми житейскими, или иным непотребством, да не внезапно найдет на мя день той.

Свят еси, Господи, Боже наш, рекий: яко на Святаго Духа хулившему не оставится ни в сем веце, ни в будущем, - соблюди мя не изнести хулу ни словесную, ни мысленную на имя Святое Твое.

Свят, Свят, Свят еси, Господи, Боже Вседержителю, Иже бе и сый и грядый, помилуй мя!

Кондак 9

Все естество земных и преисподних ужасом многим содрогнется, и Силы Небесныя подвижутся в той час, егда солнце померкнет, луна не даст света своего и звезды спадут с небес; небеса же с шумом мимо идут земли, пламенем горящей, и человеком, рыдающим, и ко Владыце всяческих, к Богу Страшному, со трепетом вопиющим: Аллилуиа.

Икос 9

Витии мира безумствуют, якоже и во дни Давида царя глаголюще: несть Бог, не видим Его! О, слепии! Почто не помышляете, яко неверием окамененнаго сердца своего себе огонь вечный готовите, и богоотступлением и прочими беззакониями кончину мира приближаете? Не слышасте ли из Писаний: яко невидимая Его от создания мира твореньми помышляема, видима суть: и присносущная сила Его и Божество. Очистите, убо, сердца своя и Бога узрите. Но пощади, Господи, от таковаго ожесточеннаго заблуждения и

неверия ум, сердце и душу мою, да с верою, упованием и любовию образ пришествия Твоего всегда себе представляю и зову Ти:

Свят еси, Господи, Боже наш, праведным судом Твоим всем нам в землю, от неяже взяты есмы, возвратитися повелевый и паки в день всеобщаго Воскресения из нея востати положивый.

Свят еси, Господи, Боже наш, солнцу, луне и звездам некогда померкнути, а земли и всему, яже на ней, огнем преобразитися предопределивый, да вместо их явится небо ново и земля нова, в нихже правда живет.

Свят еси, Господи, Боже наш, утаивый день, в оньже предстанут на суд вся племена и языцы, да восприимет кийждо по делом своим.

Свят еси, Господи, Боже наш, Пастырю добрый и Судие Праведнейший, имеяй сести в день воздаяния Твоего на Престоле разсуждения, во еже разлучити же вся народы друг от друга, якоже пастырь разлучает овцы от козлищ; да поставиши овцы одесную себе, а козлища ошуюю, и речеши праведным сладкий глас: приидите, благословеннии Отца Моего, и наследуйте Царствие, уготованное вам от сложения мира.

Свят еси, Господи, Боже наш, от Него же нераскаянные грешницы услышат тогда со страхом: отъидите от Мене, проклятии, во огонь вечный, уготованный диаволу и аггелом его.

Свят еси, Господи, Боже наш, обещаваый Церковь Свою до конца мира непоколебиму соблюсти, во еже неодоленной быти ей от всех врат адовых.

Свят, Свят, Свят еси, Господи, Боже Вседержителю, Иже бе и сый и грядый, помилуй мя!

Кондак 10

Спасти хотя древле Лота праведнаго от запаления с содомлянами нечестивыми, Владыко Господи, извел еси его вон из града и рекл еси рабу Своему Аврааму: яко аще бы и десять праведник имел град сей, не бы тогда погибл бысть, но оскудения ради святых в нем и мерзости грешных огню предается. Последи же и учеником Своим в притче плевел сельных глагола еси, яко плевелы и пшеница обоя купно имут расти до жатвы, да никогда прежде жатвы восторгающе плевелы восторгнется купно с ними и пшеница. От сего убо

и назидаемся: яко токмо праведники Твоими мир сей стоит доселе, и ради святых Твоих, в мире живущих, даеши еще время и мне, грешному, покаяться, сего ради, неизследиме Боже, благодарно вопию Ти: Аллилуиа.

Икос 10

Царю царей, Господи Спасе, Агнче непорочный, на Престоле Славы седяй, яко лев, от колена Иудова и корене Давидова возсиявый и мир победивый. Ты един достоин еси разгнути Книгу Жизни великую и разрешити печати ея! Ты, яко Агнец закланный, достоин еси прияти силу, богатство и премудрость, крепость и честь, и славу, и благоволение - ихже воспевают Ти чины Ангельстии и дуси праведных на небеси. Сподоби убо и мя, недостойнаго, с ними славити Тя в день великий и в сей час звати тако:

Свят еси, Господи, Боже наш, Содетелю и Промыслителю наш, сияяй светом солнечным и одождяй на добрых и злых; наказуяй и милуяй, нарицаяй не сущая, яко сущая; низводяй даже до ада и паки возводяй.

Свят еси, Господи, Боже наш, имейяй праведники просияти, яко солнце во Царствии Своем, - не погуби мя ради святых Твоих, но в Книзе Животней напиши мя и имя Твое начертай на челе моем.

Свят еси, Господи, Боже наш, день весь жития моего совершен, свят, мирен и безгрешен даруй ми.

Свят еси, Господи, Боже наш, Ангела мирна, верна наставника и хранителя души и тела моего на всяко время неотлучна послми ми.

Свят еси, Господи, Боже наш, по благодати Твоей, изобильно на ны излианной, презри моя прегрешения и подаждь вся добрая и полезная души моей.

Свят еси, Господи, Боже наш, прочее время живота моего сподоби мя в мире и покаянии скончати, ожидающу дне славнаго явления Твоего.

Свят, Свят, Свят еси, Господи, Боже Вседержителю, Иже бе и сый и грядый, помилуй мя!

Кондак 11

Пение всеумиленное приношу Ти, Господи, Спасе и Содетелю мой, и молю Тя, егда приидеши судити миру всему на облацех, не постыди мя, студныя дела сотворшаго, и не погуби мя, якоже погубил еси Вавилон - великую блудницу, но, веры ради моя и любви к Тебе, жителя Сиона Горняго соделай мя, идеже есть глас велий народа многаго, яко глас вод многих и яко глас грома крепкаго, глаголющих: Аллилуиа.

Икос 11

Светильник мой угасе, елея же благих дел, во еже возжеши той, несть ми; и где обрщуся окаянный, сном греховным отягченный, егда постигнет мя внезапно полночь - час кончины моя, или Суд Божий, яко тать найдет на вся живущая на земли? Но да не услышу аз, якоже юродивыя девы, грознаго гласа Жениха: не вем тя. Помози ми, о, Господи, наполнити сосуды души моея елеем благих дел, паче же милосердия и смирения, и звати Ти:

Свят еси, Господи, Боже наш, даждь ми послужити меньшей братии Твоей, якоже Самому Тебе: алчущии и жаждущии насытити, странныя приютити, нагия одеяти, больныя и в темницах страждущия посещати, да сподоблюся части десныя стояния на Суде Твоем.

Свят еси, Господи, Боже наш, отыми от мене дух гордости, праздности и уныния бесовскаго и подаждь ми дух смиренномудрия, целомудрия, кротости и радости духовныя.

Свят еси, Господи, Боже наш, вложи в мысль мою мудрость сына Сирахова: помнити последняя моя, дабы во веки не согрешити.

Свят еси, Господи, Боже наш, Женише, красный добротою паче всех человек, грядый в полнощи, - с мудрыми девами в рай введи мя.

Свят еси, Господи, Боже наш, приими мольбу о нас и предстательство всех святых Твоих паче же простирающую к Тебе всегда о нас руце Своя Деву Пречистую, Тебе рождшую.

Свят еси, Господи, Боже наш, огради нас святыми Твоими Ангелы и отжени от нас духов злобы поднебесных.

Свят, Свят, Свят еси, Господи, Боже Вседержителю, Иже бе и сый и грядый, помилуй мя!

Кондак 12

Благодать Твою, Господи Боже наш, грешныя милующую, сведуще, аще и недостойное житие явихом; обаче надежду Воскресения и жизни вечныя имуще, христианския кончины живота нашего, безболезненны, непостыдны, мирны, Божественных Таин причастны, и добраго ответа на Страшнем Судищи Твоем всегда просим, во умилении зовуще: Аллилуиа.

Икос 12

Поюще Твое непостижимое о людех и о мире, Тобою сотворенном, промышление, Вседержителю Отче, Сыне и Душе, Господи наш, славлю Тя, создание и раб Твой, и, яко чадо Церкви Православныя, чаю Воскресения мертвых и жизни будущаго века; в веце же настоящем молю Тя, Блаже: избави мя искушений, от мира, плоти и диавола находящих на мя, и укрепи в вере несумненной и любви к Тебе; да благочестне, чисто и свято прочее время живота проживу и сподоблюся части правыя в день пакибытия, зовуща Ти:

Свят еси, Господи, Боже наш, Мздовоздаятелю Праведный, судити имеяй на велицем Престоле Своем, от Егоже Лица побегнут небо и земля, и место их не обретется.

Свят еси, Господи, Боже наш, всем нам явитися пред Судище Твое положивый, да воздаши коемуждо яже с телом содела: благая или злая; еже предопределил еси мне прежде дне того скончаться, - даждь ми безбедно прейти мытарства воздушныя бесовския и оправдатися на первом, частном, суде Твоем.

Свят еси, Господи, Боже наш, сатану и аггелы его, зверя и лжепророка во езеро огненное на мучения вечныя Архангелом Твоим Михаилом ввергнути имеяй; того предстательством избави мя муки страшныя, тартара и тьмы кромешныя и геенны огненныя, идеже червь не умирает и огонь не угасает.

Свят еси, Господи, Боже наш, всех Твоих ради святых, изряднее же святых Твоих щедрот и Крове Твоея, за ны пролиянныя, жителя мя сотвори Ие-

русалима Небеснаго, идеже несть ни смерти, ни плача, ни вопля, ни болезни, ни скверны некия, но жизнь безконечная, и слава Твоя присно осеняет его.

Свят еси, Господи, Боже наш, прежде сих всех помози ми соблюдати словеса евангельския, творити волю Твою и прилежно внимати пророчеству Откровения Иоаннова, яко время близ есть.

Свят еси, Господи, Боже наш, рекий в конец Богослову: яко, дондеже суд приидет, скверный - да сквернится еще, а святой - да святится еще. Ей, гряди скоро, и мзда Моя со Мною есть. Аминь! Ей, гряди, Господи Иисусе, молит Тя Церковь Твоя, зовущи:

Свят, Свят, Свят еси, Господи, Боже Вседержителю, Иже бе и сый и грядый, помилуй мя!

Кондак 13

О Великий и Непостижимый Боже! Альфа и Омега, начало и конец всему существу, Иже вчера, днешь и во веки Той же, и у Него же несть пременения, Егоже и лета не оскудеют. Приими сие малое акафистное моление мое в память грядущаго и Страшнаго Суда Твоего, всегда мною Тебе приносимое, и, по множеству щедрот Твоих, очисти беззакония моя, и имя мое в Книзе Живота напиши, и в юдоль плача не осуди, егда судити сядеши; и от пресветлаго лица Твоего не отлучи мене. Да егда скончаются дни века сего, и небеса и земля сия мимо идут, и светила, яко воск истаят, тогда, о, Всемилоitive, да узрю и аз стены Горняго Иерусалима, и купно со избранными десными Твоими овцами вниду во святой град сей и тамо насыщуся славы Твоея и буду пети Ти песнь нову во вся веки веков: Аллилуиа.

Сей кондак читается трижды, таже:

Икос 1

Архангельския трубы возглашение, на Суд Господень Страшный и Последний, живыя и мертвыя от всех конец земли собирающее, уже во ушесех предносится. Душе моя, душе моя, востани, что спиши? Конец приближается, и имаши смутитися. Воспряни убо, яко мало есть еще время на покаяние;

бодрствуй, молися и трезвися и дела добрая твори, непрестанно вопиючи ко Владыце своему таковая:

Свят еси, Господи, Боже наш, и Пресвят, и да святится и в сем грешном и во зле лежащем мире имя Твое, паче всякаго имене.

Свят еси, Господи, Боже наш, да приидет Твое славное Царствие.

Свят еси, Господи, Боже наш, да будет во всем воля Твоя святая на земли, якоже пребывает и на небеси.

Свят еси, Господи, Боже наш, хлеб земный насущный даяй нам, паче же небесный даждь ми на всяк день.

Свят еси, Господи, Боже наш, остави ми согрешения моя, якоже и аз оставляю брату своему согрешения его.

Свят еси, Господи, Боже наш, не введи мя в напасть, но избави мя от сетей лукаваго миродержителя тьмы века сего, ибо поистине опасно ходим и дние наша лукави суть.

Свят, Свят, Свят еси, Господи, Боже Вседержителю, Иже бе и сый и грядый, помилуй мя!

Кондак 1

Предвечный Царю веков, Творче и Господи, Судие Праведнейший и нелицеприятный, множество содеянных мною лютых помышляя, окаянный аз, трепещу Страшнаго Дне Суднаго, но, надеясь на милость неизреченнаго благоутробия Твоего, давидски молю Тя: по велицей Твоей милости прости мя недостойнаго, и не осуди мя по деянием моим, яко да благою совестью очищен, на всяк день и час Ангельскую песнь приношу Ти: Свят, Свят, Свят еси, Господи, Боже Вседержителю, Иже бе и сый и грядый, помилуй мя!

Прокимен, глас 7:

Господи, да не яростию Твоею обличиши мене, ниже гневом Твоим накажешо мене.

Стих: Услыши, Боже, глас мой, вегда молити ми ся к Тебе.

Евангелие от Матфея, зачало 106, глава 25, стихи 31-46.

Слава: Молитвами Апостолов, Милостиве, очисти множество согрешений наших.

И ныне: Молитвами Богородицы, Милостиве, очисти множество согрешений наших.

Помилуй мя, Боже, по велицей милости Твоей, и по множеству щедрот Твоих очисти беззаконие мое.

Стихира, глас б:

Возгласят трубы, и истошатся гробы, и воскреснет человеческое все естество трепещущее, добрая содеявшии, в радости радуются, чающе мзду восприняти: согрешившии же трепещут, люте рыдающе, в муку посылаеми, и от избранных разлучаеми. Господи Славы, ущедрни нас яко благий, и части сподоби возлюбивших Тя.

Диакон: Господу помолимся.

Лик: Господи помилуй.

И чтем молитву сию:

Яко на Страшнем Твоем, и нелицеприемнем предстояй Судилищи, Христе Боже, и осуждения подъемля, и слово творя о содеянных мною злых: сице днесь, прежде даже не приити дневи осуждения моего, у святаго Твоего Жертвенника предстоя пред Тобою, и пред страшными и святыми Ангелы Твоими, преклонен от своя совести, приношу лукавая моя и беззаконная деяния, являяй сия и обличаяй. Виждь, Господи, смирение мое, и остави вся

грехи моя, виждь яко умножишася паче влас главы моя беззакония моя. Кое убо не содеях зло? Кий грех не сотворих? Кое зло не вообразих в души моей? Всякое мое чувство и всякий уд оскверних, растлих, непотребен сотворих, делателище быв всячески диаволе. И вем, Господи, яко беззакония моя превзыдоша главу мою. Но безмерно есть множество щедрот Твоих, и милость неизреченна незлобивыя Твояе благодати, и несть грех, побеждающь человеколюбие Твое. Темже, Пречудный Царю, незлобиве Господи, удиви и на мене, грешнем, милости Твоя, покажи благодати Твояе силу и яви крепость благоутробнаго милосердия Твоего, и обращающася приими мя, грешнаго. Приими мя, якоже приял еси блуднаго, разбойника, блудницу. Приими мя, пребезмерно и словом, и делом, и похотию безместною, и помышлением безсловесным согрешивша Тебе. И якоже во едионадесятый час пришедших приял еси, ничтоже достойно соделавших, тако приими и мене, грешнаго: много бо согреших, и осквернихся, и опечалих Духа Твоего Святаго, и огорчих человеколюбную утробу Твою, и делом, и словом, и помышлением, в нощи и во дни, явленне же и неявленне, волею же и неволею. И вем, яко представиши грехи моя предо мною таковы, яковы же мною содеяшася, и истяжеш слово со мною, о ихже разумом непрощенно согреших. Но, Господи, Господи, да не праведным судом Твоим, ниже яростию Твоею обличиши мя, ниже гневом Твоим накажеш мя. Помилуй мя, Господи, яко не токмо немощен есмь, но и Твое есмь создание. Ты убо, Господи, утвердил еси на мне страх Твой, аз же лукавое пред Тобою сотворих, Тебе убо единому согреших. Но молю Тя, не вниди в суд с рабом Твоим. Аще бо беззакония назриши, Господи, Господи, кто постоит? Аз бо есмь пучина греха и несмь достоин, ниже доволен воззрети и видети на высоту небесную от множества грехов моих, ихже несть числа. Киими бо не растлихся грехи? Киими не содержахся злыми? Всяк грех содеях, всякую нечистоту вложих в душу мою: непотребен бых Тебе, Богу моему, и человеком. Кто возставит мя, в сицевая злая и толика падшаго согрешения? Господи Боже мой, на Тя уповах: аще есть ми спасения упование, аще побеждает человеколюбие Твое множества беззаконий моих, буди ми Спаситель, и по щедротам Твоим и милостем Твоим, ослаби, остави, прости ми вся, елика Ти согреших, яко многих зол исполнися душа моя, и несть во мне спасения надежды. Помилуй мя, Боже, по велицей милости Твоей, и не воздаждь ми по делом моим, и не осуди мя по деянием моим, но обрати, заступи, избави душу мою от совозрастающих ей зол и лютых восприятий. Спаси мя ради милости Твояе: да идеже умножится грех, преизобилует благодать Твоя. Даруй ми слезы сокрушения и умиления сердечнаго, возводящая

падшия ко своему наследию, ими же очищуся от всякаго греха, ибо страшно и грозно место имам проити, тела разлучився: множество тогда, мрачное и безчеловечное демонов срящет мя, и никтоже в помощь спутствуяй или избавляяй, но дела моя осудят мя. Сего ради прежде конца в покаянии приими мя и никогдаже отлучайся мене, раба Твоего, но всегда во мне почивай, не предаждь мене крамоле змиине и желанию сатанину не остави мене, яко семя тли во мне есть. Ты убо, Господи Боже покланяемый, Царю Святыи, Иисусе Христе, сохрани мя Духом Твоим Святым, Имже освятил еси Твоя ученики. Дажь, Господи, и мне, недостойному рабу Твоему, спасение Твое: ум мой светом разумения Святаго Евангелия Твоего просвети, душу любовию Креста Твоего озари, сердце чистотою словесе Твоего убели, тело мое Твоею страстию безстрастною исцели, мысль мою Твоим смирением сохрани, и воздвигни мя к деланию заповедей Твоих, и даруй ми бодренным сердцем и трезвенной мыслию всю настоящаго жития ночь прейти, ожидающему пришествия светлаго и явленнаго дне Твоего. Ты убо еси, Господи, Свет, паче всякаго света, Радость, паче всякия радости, Упование, паче всякаго упования, Жизнь истинная и Спасение, пребывающее во веки веков. Аминь!

Песнь 7

Ирмос: От Иудеи дошедше отроцы, / в Вавилоне иногда, / верою Троицкою пламень пещный попраша, поюще: / отцев Боже, благословен еси.

Не надейся, душе моя, / на тленное богатство и на неправедное собрание, / вся бо сия не веси, кому оставиши, / но возопий: помилуй мя, Христе Боже, недостойнаго.

Не уповай, душе моя, / на телесное здравие / и на скоромимоходящую красоту, / видиши бо, яко сильнии и младии умирают; / но возопий: помилуй мя, Христе Боже, недостойнаго.

Слава: Воспомяни, душе моя, вечное житие, / Царство Небесное, уготованное святым, / и тьму кромешную и гнев Божий злым, / и возопий: помилуй мя, Христе Боже, недостойнаго.

И ныне: Припади, душе моя, к Божией Матери и помолися Той, / есть бо скорая помощница кающимся, / умолит Сына Христа Бога, / и помилует мя недостойнаго.

Песнь 8

Ирмос: Царя Небеснаго, / Егоже поют вои ангельстии, / хвалите и превозносите во вся веки.

Како не имам плакаться, егда помышляю смерть, / видех бо во гробе лежаща брата моего, / безславна и безобразна? / Что убо чаю, и на что надеюся? / Токмо даждь ми, Господи, прежде конца покаяние. (Дважды)

Слава: Верую, / яко приидеши судити живых и мертвых, / и вси во своем чину станут, / старии и младии, владыки и князи, / девы и священницы; / где обрящуся аз? / Сего ради вопию: / даждь ми, Господи, прежде конца покаяние.

И ныне: Пречистая Богородице, / приими недостойную молитву мою / и сохрани мя от наглыя смерти, / и даруй ми прежде конца покаяние.

Катавасия, таже поем: Честнейшую...

Песнь 9

Ирмос: Воистинну Богородицу Тя исповедуем, / спасеннии Тобою, Дево Чистая, / с безплотными лики Тя величающе.

Ныне к вам прибегаю, Ангели, Архангели / и вся Небесныя Силы, / у Престола Божия стоящи, / молитесь ко Творцу своему, / да избавит душу мою от муки вечныя.

Ныне плачуся к вам, / святии патриарси, царие и Пророцы, / Апостоли и святителие / и вси избранныи Христовы: / помозите ми на суде, / да спасет душу мою от силы вражия.

Слава: Ныне к вам воздежу руке, / святии мученицы, / пустынницы, девственницы, / праведницы и вси святии, / молящиися ко Господу за весь мир, / да помилует мя в час смерти моея.

И ныне: Мати Божия, / помози ми, на Тя сильне надеющемся, / умоли Сына Своего, / да поставит мя недостойнаго одесную Себе, / егда сядет судяй живых и мертвых, аминь.

Таже: Достойно есть... Малая ектения.

И по возгласе стихирь на хвалитех, глас 6:

Стих: Хвалите Его в кимвалех доброгласных, хвалите Его в кимвалех восклицания. Всякое дыхание да хвалит Господа.

Помышляю день оный и час, егда имамы вси нази и яко осуждени, неумытному Судии предстати, тогда труба возшумит вельми, и основания земли подвижатся, и мертвии от гробов воскреснут, и возрастом едином вси будут, и всех тайная явленна предстанут пред Тобою и возрыдают, и восплачутся, и во огонь кремешный отъидут, иже николиже покашася: и в радость и веселие праведных жребий внидет в чертог небесный.

Стих: Исповемся Тебе, Господи, всем сердцем моим, повем вся чудеса Твоя.

Даниил пророк, муж желаний быв, властительное Божие виде, сице вопияше: Судия седе и книги разгнушася. Блюди, душе моя, постиши ли ся? ближняго твоего не презри; от брашен воздержиси ли ся? брата твоего не осуждай, да не в огонь отсылаема сгориши, яко воск, но да без преткновения ведет тя Христос в Царствие Свое.

Слава, и ныне, глас 8:

Егда поставятся престоли и отверзутся книги, и Бог на Суде сядет, о кий страх тогда Ангелом, предстоящим в страхе, и реце огненной влекущей! Что сотворим тогда, во многих гресех повиннии человецы? Егда же услышим зовуща Его благословенныя Отца в Царство, грешныя же отсылающа в муку, кто потерпит страшнаго онаго изречения? Но, едине Человеколюбче Спасе, Царю веков, прежде даже кончина не приспее, покаянием обратив, помилуй мя.

Славословие великое и отпуст.

Акафист, найденный в бумагах блаженного старца Севастиана Карагандинского при подготовке материалов к его канонизации. Предположительно привезен кем-то из русского духовенства, проживавшего после прихода к власти в России большевиков в Шанхае и вынужденного оставить город во время революционных событий в самом Китае.